



FACTVM,

POVR IEAN GRAVE' SIEVR DE LAVNAY,
Tresorier General des Finances en Bretagne.

*Contre André Fortin Sieur de Ferrieres, Lieutenant General, Civil
& Criminel au Bailliage de Mortaing, Gilles Fortin sieur de Guimar-
cheres, Lieutenant du Preuost de Normandie, au siege de Mortaing, Ni-
colas Bachelot & autres accusez.*

plus 23



O V T E la difficulté de ce procez ne peut estre qu'à trouuer
vne punition assez rude pour la meschanceté la plus noire, la
plus horrible & la mieux conuaincuë qui puisse iamais paroi-
stre aux yeux de la Iustice, & meriter sa derniere indignation :
Car dans cette action barbare, les accusez ont commencé par
ou les autres finissent, & la mort d'un homme certainement
innocent, qui est le comble de toutes les cruautéz, a passé dans ces conscien-
ces insensibles pour vn jeu d'esprit, vn moyen de paruenir à vn brigandage
public, & à l'oppression de nombre de personnes, esgalement innocen-
tes.

Et bien qu'il ne faille point chercher de preuues hors le procez pour mon-
strer que toutes choses sont possibles à ces personnes determinées, il importe
neantmoins de remarquer qu'elle a esté de tout temps leur conduite & leur
reputation.

La famille des Fortins est publiquement diffamée par des actions qui ne
se peuuent reciter sans horreur, car en l'année 1598. Iacqueline Fortin, tan-
te des accusez, fust condamnée à faire amande honorable, le poing couppe,
traisnee sur vne claye, tenaillée, son corps bruslé, sa teste exposée, pour
auoir assassiné sa fille & son gendre dans l'excès auégle d'une impudicité
brutale.

Par cet Arrest l'innocence & la honte estans sorties de ceste famille, il ny
est plus resté d'autre soin que d'amasser des biens par toute sorte de voyes,
Fortin Beaupré S^r de Cresnay par la fausse monnoye, qu'il a publiquement
exercée, Ferrieres Fortin & Guimarchere par les injustices & exactions que
ils ont commises dans leurs charges, & particulierement ledit Guimarche-
re, assisté à ce faire par le nommé Bachelot l'un des plus scelerats & des plus
grands faussaires qui ait iamais esté en Normandie, comme il est iustifié par
vn Arrest du Parlement de Rouën, & par infinité d'autres preuues.

Beaupré ayant eu aduis qu'au mois de Iuin 1640. Fremont Menainuille &
sa femme, accusez de fausse monnoye, l'auoient denoncé au sieur de Mon-
tauron, il creut que le seul moyen pour destourner ceste accusation estoit ce-
luy, dont la Montarbault & plusieurs autres estoient seruis, de proposer au
sieur de Montauron vn plus grand profit & d'autres accusez, & ayant com-
munié ce pernicieux dessein à Ferrieres son beau-frere & Guimarchere
son cousin, ils trouuerent que le moyen le plus facile pour le faire reussir,
estoit de sacrifier vne personne sans resistance, dans la perte de laquelle ils



peussent enuclopper telles personnes que bon leur sembleroit.

Ils choisirent pour leur victime, vn pauvre insensé nommé Iacques Leuesque, autrement Iacques Langlois, ou Iacques de Partout, luy ont fait son procez, & sans aucune charge considerable, sans l'auoir ouy sur la sellette, ils l'ont condamné à mort, & fait executer le quatriesme Aoust 1640. & luy ont supposé vn testament de mort, dans lequel ils ont fait charger plusieurs personnes, & entr'autres le sieur de Launay-Graué & le sieur du Tertre-Barré.

Entre vnze heures & midy Ferrieres Fortin, qui auoit esté le premier & principal des Iuges, ayant rencontré vn nommé Pinot son Procureur au Parlement de Bretagne, natif d'une lieue de Mortaing, & duquel depuis ce procez, il a emprunté de l'argent comme son amy & confident, & par consequent tesmoin irreprochable contre luy, il luy dict que le sieur de Launay-Graué & le sieur de Tertre-Barré estoient compris dans ce testament, & luy ayant fait voir entre les mains de Guimarchere ce testament ou leurs noms estoient escrits, & proposé audit Pinot que s'ils estoient de ses amis, il les pourroit sortir d'affaires, on ne se contenta pas de cét aduis, mais Fortin Vicomte de Mortaing son frere estant party le premier pour venir en cette ville, & ayant rencontré le Messager de Bretagne, il fit sonner ce testament: dit qu'il auoit chargé plusieurs personnes tant de Normandie que de Bretagne, & nomma entr'autres les sieurs du Tertre-Barré & Launay-Graué, & pour y donner plus de creance, il remarqua que Pinot, estoit present à l'execution & inuita le sieur Despreaux d'en escrire comme il fit les six & huit Aoust au sieur Gardin à Rennes, au sieur de la Ville-Malterre à saint Malo, pour en aduertir ledit sieur de Launay, & ledit Beaupré est demeuré d'accord d'auoir enuoyé luy-mesme le testament audit Vicomte de Mortaing son frere, pour le bailler au sieur de Montauron.

Le nommé Desbuttes natif de Cresnay, Vassal de Beaupré, qui fait sa demeure dans saint Malo, & qui estoit dans la mesme conspiration, apporta par l'ordre de Beaupré le mesme aduis à S. Malo, & fit effort pour attirer le sieur de Launay à quelque composition.

Et par toutes ces voyes le sieur de Launay-Graué ayant appris ce testament, il a rendu par sa resolution vn tesmoignage indubitable de son innocence, car au lieu d'entendre aux propositions d'accommodement qui estoient faites de la part des Iuges, il n'a point eu d'autre soin que de se iustifier, il a pour cét effect enuoyé à Mortaing vn Procureur du Parlement de Bretagne, nommé Iustel, pour apprendre des nouuelles de ce pretendu testament.

Iustel s'est adressé à Bachelot pour en auoir vne coppie, & par l'entremise d'un nommé Giroult sieur de la Corbeliniere, Bachelot en a promis vn extrait moyennant quatre pistolles, & Iustel s'estant assuré à ceste parolle & retourné sans rien faire, il y enuoya Pinot Procureur de Ferrieres, qui luy apporta l'extrait du pretendu testament pour l'article qui le concernoit, dás lequel on fait dire à ce nommé Leuesque, qu'il auoit seruy vn nommé Dom Pierre Blanche, qui portoit vn habit d'Hermite, qu'il arriua avec luy à saint Malo, qu'ils furent voir vn Marchand nommé Iuif Tertre-Barré, qu'il fit pour luy pour 53000. liures de Reaux, que depuis il le bailla à vn nommé Cassier seruiteur de Launay-Graué pour luy monstrier à trauailler, qu'ils furent en vne maison proche la grande Eglise, qu'il fit pour 27000. liures de Reaux dont il paya vne terre nommée la Ville aux Oyseaux.

Et bien que le sieur de Launay-Graué eust preuue par escrit de la suppo-

sition de ce Testament, par ce qu'il y a long-temps qu'il a acquis la terre de la ville aux Oyseaux, & en vn temps ou les Reaux n'auoient point de cours en Bretagne, qu'il en a payé la meilleure partie en Lettres de change, & n'a iamais eu de valet nommé Cassier, neantmoins touché du sentiment & de l'impatience qu'un homme d'honneur doit auoir pour sa reputation, il est venu en ceste ville & s'est présenté à la Chambre pour se iustifier de cette calomnie, & ayant appris; Que Pierre Fortin Vicomte de Mortaing, frere de Beaupré & de Ferrieres, dans le voyage qu'il auoit fait le lendemain de l'exécution de Leuesque, auoit apporté au sieur de Montauron coppie du testament; demandé la Commission pour Guimarchere son Cousin pour faire le procez aux faux-monnoyeurs en Normandie & en Bretagne; & avec paction que l'on ne poursuuiroit point Beaupré son frere, & qu'ils auroient les deux sols pour liure de ce qui prouieroit de ce testament. Ledit sieur de Launay-Graué vit le sieur de Montauron, pour sçauoir au vray de quoy il estoit accusé, & le sieur de Montauron qui ne voyoit dans ce Testament, autre accusation sinon d'auoir payé la terre de la ville aux Oyseaux en fausse monnoye, dit audit sieur de Launay en presence de personnes d'honneur & de grande condition, que pourueu qu'il iustificast auoir payé la terre de la ville aux Oyseaux, en autre monnoye, il le tiendrait pour innocent & n'en feroit aucune poursuite.

Mais ledit sieur de Launay qui auoit interest de ne pas laisser la moindre tache sur l'innocence de sa fortune, obtint Arrest le 3. Octobre 1640. Par lequel il fust ordonné que les charges & informations seroient apportées, deffences de mettre aucuns decrets à execution.

Au mesme temps ayant eu aduis que les Officiers de Mortaing tenoient la femme de Leuesque & d'autres prisonniers, & qu'ils auoient resolu de les iuger de mesmes qu'ils auoient fait Leuesque, & courir par de nouvelles fourbes, la premiere qu'ils auoient commise; il s'en est plainct à la Chambre, & par Arrest du 26. Octobre; Il fust ordonné que le procez seroit fait aux accusez par le sieur Duduit, & deffences aux Officiers de Mortaing de passer outre au Iugement du procez.

Lors de la signification de cet Arrest, le Lieutenant Particulier le receut comme vn Iugement du Ciel, & declara hautement qu'il en auoit vne satisfaction extreme, que le Testament de Leuesque estoit vne fripponnerie, & que sans cet Arrest il estoit disposé d'en faire luy-mesme sa plainte à la Chambre, tous les autres espouuantez ne respondirent autre chose sinon qu'il falloit accommoder cette affaire, que le sieur de Launay-Graué le pouuoit faire tres-facilement.

Mais auparauant & dès l'heure qu'ils auoient appris la poursuite que l'on faisoit à la Chambre, ils firent sortir des prisons la vefue de Leuesque & tous les autres prisonniers, sous pretexte de la contagion, & quoy qu'ils en eussent dressé procez verbal pour la descharge du Geollier, neantmoins par vne malice aueugle qui n'eust iamais peu tomber en d'autres esprits, ils ont voulu faire croire que c'estoit le sieur de la Bouueraye, enuoyé par le sieur de Launay-Graué, qui les auoit fait euader, & auoient par ceste apparence, tellement surpris le sieur Duduyt, que contre les termes de l'Arrest du 26. Octobre, il les auoit subdeleguez pour faire l'instruction du procez qui luy auoit esté commise.

Et quoy que ledit sieur Duduit preueni par les suppositions & artifices des Officiers de Mortaing, & eux-mesmes interessez dans la deffence de leur

mauvais procédé, ayent eu tout le loisir & la liberté de trouver contre ledit Sieur de Launay-Graué, tout ce que la passion desdits Officiers leur pouvoit suggerer, leur calomnie s'est trouvée si destituée, & leur meschanceté si publiquement auerée, que ny par la force des monitions qui pressent les ames innocentes, ny par tous les artifices qui peuvent corrompre les consciences perduës, ils n'ont trouvé personne qui voulust prendre avec eux le peril de ceste infame conspiration.

Par l'air du procez de Jacques Leuesque qui a esté apporté à la Chambre, l'audition de sa femme & de plusieurs autres tesmoins, la Chambre a reconnu partie des fourbes qui ont esté faites en l'instruction de ce procez, & sur tout en la confection de ce pretendu testament: Car outre qu'il a paru que Jacques Leuesque estoit vn homme insensé, & par consequent incapable de la fausse monnoye, & de toutes les declarations qu'on luy a fait faire par ce testament supposé, La Chambre a veu que le testament auoit esté necessairement changé, que celuy qui a esté enuoyé au Greffe n'a point de conformité avec celuy qui auoit esté montré à Pinot, recité par Fortin Vicomte, & dont la coppie auoit esté baillée par Bachelot, ny mesmes à la coppie baillée au sieur de Montauron; Car au lieu que dans ce premier testament on auoit chargé le sieur de Launay d'auoir payé la terre de la ville aux Oyseaux en fausse monnoye, & chargé quantité d'autres personnes, il n'en est point parlé dans le second testament, mais on fait tenir vn tout autre discours, sçauoir. Que deux ans auparauant Leuesque auoit trauaillé pour le sieur de Launay qu'il qualifie Receueur des traictes Foraines, pour lequel il auoit ietté en sable cinquante-deux mil Reaux avec vn nommé Cassier, que ledit sieur de Launay demouroit pres la grande Eglise de saint Malo, & qu'il enuoyoit des Lingots en la monnoye de Nantes; Et par vne infinité d'autres circonstances, & par les lumieres que la Iustice diuine fait naistre pour la descouuerte des crimes, est interuenul' Arrest du 27. Feurier 1641. Par lequel il a esté ordonné qu'il seroit informé tant à charge qu'à descharge des faits qui seroient donnez par le Procureur du Roy, extraicts & resultans du procez, & le procez fait iusques à sentence diffinitive exclusiuelement, permis d'interroger, & que l'interrogatoire de Leuesque fait sur la fellette seroit apporté.

Pour l'execution de cét Arrest, le sieur de Montauron ayant à la poursuite de Beaupré fait commettre Monsieur de Villayer, il s'est transporté sur les lieux; & par ce que iusques là le sieur de Launay tenoit lieu d'accusé, il a commencé sa procedure par les lieux où il pouuoit trouver preuue contre luy s'il eust esté coupable; à Nantes où il a fait sa charge, à Rennes où il tient sa banque, à S. Malo lieu de sa naissance, & toute ceste recherche n'a seruy qu'à rendre son innocence plus certaine.

Car on a trouué, non seulement qu'il auoit acquis sa maison de la ville aux Oyseaux longtemps auparauant l'année 1638. payé la plus part en lettres de change, ce qui destruit le premier Testament: Mais il s'est trouué pour la destruction du second, qu'en l'année 1638. il n'estoit point demeurant à saint Malo, que la maison où il est logé, est tres-esloignée de la grande Eglise, qu'il n'y a point de traictes Foraines en Bretagne, qu'il y a plus de dix ans que la monnoye de Nantes ne trauaille, qu'il n'a iamais eu de seruiteur nommé Cassier, qu'en l'année 1638. Il n'auoit autre personne qui prist soin de ses affaires dans S. Malo, que la nommée Perrine Bouyn, en sorte qu'il n'y a pas vn mot dans le testament dont la fausseté ne soit clairement auerée.

Aussi n'est-il plus question de iuger si le sieur de Launay est innocent, car cela n'est point reuoké en doute. Mais de sçauoir à qui cette calomnie doit estre imputée, & bien qu'il soit assez aisé de iuger, que c'est l'ouurage & la malice des Iuges, puis qu'il n'y a pas d'apparence de croire que ce mensonge ait esté imprudemment proferé, par vn homme mourant, pour perdre gratuitement son ame avec sa vie, Quand on a examiné le procedé des Iuges de Mortaing, on a trouué des meschancetez bien plus noires, & sur vn seul crime, il ne se vit iamais tant de malices, de faussetez, d'injustice(& par ce que ces termes sont trop doux il faut dire) tant d'abominations assemblées.

Car le dit sieur de Launay pretend qu'il est iustificié par plus de cent resmoins; que Jacques Leuesque estoit vn homme notoirement insensé, cogneu pour tel dans tous les lieux ou il a frequenté, appelé pour ceste raison de Partout, Fallot, Sibillot, Baron d'Ispe, qui coiffait des Vaches & vn Pilory, qui faisoit des predications sur le haut d'iceluy, qui alloit sonner à l'Eglise, quand il voyoit vn cochon tué, qui rompoit sa chemise & alloit tout nud, qui estoit ordinairement couuert de plumes, attiroit tous les enfans à sa suite, qui portoit vne hotte chargée de pierres, ou vne arbaleste pour tirer aux chiens & aux personnes, qui commettoit iournellement ces extrauagances, qui viuoit d'aumosnes & n'auoit rien vaillant; & outre qu'il est impossible que d'une verité si publique, les Officiers de Mortaing n'eussent point de cognoissance, le dit sieur de Launay estime qu'il est iustificié; que Guimarchere luy a veu donner le fouet dans la maison du sieur Marquis de Bressé comme à vn fol, pour s'estre despoüillé tout nud, couru en cet estat apres des filles & auoir mesmes voulu forcer la fille de sa femme: Et d'auoir choisi cet homme pour le prendre comme vn faux-monnoyeur, c'est le plus effroyable de tous les homicides, la plus barbare de toutes les inhumanitez.

La seule deffense des accusez est fondée sur l'enormité de leur crime, qu'il est incroyable qu'on ait conceu vn dessein si horrible, qu'un Siege tout entier y ait contribué, qu'on ait presumé de le faire reussir, qu'on y soit paruenue, qu'un homme ayant esté condamné, confessé & executé, n'ait point rendu tesmoignage de sa folie au Curé qui l'a assisté, à tout le peuple qui a veu son execution.

Mais outre que ce n'est pas le premier innocent qu'on ait fait mourir, & particulierement en Normandie ou les Officiers d'Andely fournissent vn exemple assez memorable, outre qu'il n'y a point de personne dont la condamnation soit si facile & la perte si seure & si negligée que d'un homme insensé, les accusez ne prennent pas garde que dans ceste deffence ils decouurent vne malice qui ne se peut excuser; Car pour faire que ceux qui ont assisté au iugement du procez, cogneussent l'esprit de Jacques Leuesque, il auroit fallu qu'il eust esté interrogé sur la sellette, & sur ce sujet la Chambre auoit ordonné que son interrogatoire fait sur la sellette seroit apporté, les accusez pressez de le représenter ont dit pour toute deffaitte, que l'on n'auoit point accoustumé d'interroger les accusez sur la sellette, & par consequent impertinent de dire que ceux qui ont assisté au iugement n'ont point cogneu la folie? Car comment auroient-ils recogneu l'esprit d'un homme qu'ils n'ont point interrogé; Mais c'est vne supposition de dire qu'en Normandie on n'ait point accoustumé d'interroger sur la sellette, & le sieur de Launay estime, que le contraire est iustificié au procez, & luy-mesme rapporte des Sentences contraires, apres cela qui peut doubter que ceste formalité

n'ait esté expressement obmise pour cacher la folie d'un homme qui eust peu empescher sa condamnation.

Et quand au tesmoignage du Curé de Mortaing, il ne peut estre qu'extremement suspect, par ce que ce n'est point luy qui a accoustumé d'assister des personnes condamnées; & pour monstrier qu'il a esté choisi par les Officiers de Mortaing, comme estant de leur intelligence & de leur caballe, ce Curé a esté contrainct de recognoistre luy-mesme, qu'on l'auoit rendu complice d'une fausseté que les Officiers de Mortaing ont faite, parce que le Curé de Vezins a rapporté un billet escrit de la main du Curé de Mortaing, dans lequel il y a une marque supposée faite par Leuesque, & lors que ce billet a esté représenté au Curé de Mortaing, il en a recogneu la fausseté, qu'il auoit escrit le billet; mais qu'il n'auoit iamais veu faire de marque à Leuesque.

Mais pour sçauoir s'il est possible que les Officiers de Mortaing, ayent condamné un homme innocent & insensé, il ne faut que voir les autres meschancetez dont le procez est si plein, qu'il n'y a pas une piece qui ne soit faulse & d'une malice tres exquise.

Il s'est trouué que le denonciateur est un ieune enfant de douze ou quatorze ans, lequel s'estant absenté avec son pere à l'arriuee de Monsieur le Commissaire, les accusez ont esté assez impudens pour supposer, que ledit sieur de Launay l'auoit fait noyer; Et apres plusieurs perquisitiōs il s'est trouué dans la maison de beaufrere dudit Beaupré.

Ils ont encore voulu supposer, que c'estoit le sieur de Vezins qui estoit la vraie partie, & qui auoit présenté son valet pour denonciateur, & bien que ce soit une mauuaise deffense à des Iuges, de receuoir un homme denonciateur sous le nom de son valet, & d'un enfant, cela est faux; car le sieur de Vezins a rapporté une lettre de Bachelot, par laquelle il luy escriuoit qu'il enuoyast ce denonciateur & que Guimarchere luy en auroit obligation.

Il s'est trouué que ceste denonciation & la deposition d'un nommé Besnier, qu'on a dattées du septiesme Decembre 1639. n'ont esté faites que depuis la prison de Leuesque, comme ont recogneu tous ceux qui ont veu mener ce beau denonciateur, comme a recogneu Besnier luy mesmes qui est prisonnier.

Il s'est trouué qu'une information du 23. Iuin 1640. a esté signée depuis la mort de Leuesque par le nommé Iouault, qui n'auoit point esté present à la deposition des tesmoins, & qui a recogneu l'auoir signée depuis la mort, & est pareillement prisonnier.

Il s'est trouué que les autres informations ou l'on a fait signer les nommez Breton, Vannier & Langelier, ont esté escrites par Bachelot, & que iamais aucun d'eux ny fust present, ainsi que le iustifie la fuitte dudit Breton, & la confession de tous ceux qui ont esté ouys.

Et nonobstant toutes ces faussetez, on dit que dans ce procez, Leuesque n'estoit accusé, que d'auoir voulu faire passer trois ou quatre pieces de sept sols. D'auoir la dessus condamné au gibet un homme fol & insensé, cela crie vengeance au Ciel, & merite une expiation publique, quand il ny auroit que ce sang innocent qui en demanderoit la Iustice.

Mais la principale fausseté qui ne se peut couvrir, est celle qui a esté commise en la confectiō du testament, car le sieur de Launay a appris, qu'il est signé de Bachelot qui n'y estoit point present, qu'il est escrit de la main du nommé le Vannier, qui recognoist neantmoins ne l'auoir point entendu, &

7
qui a esté arresté prisonnier sur sa confession ; & parce que dans le mesme testament, on a apposé vne marque que l'on a voulu faire passer pour la marque de deffunt Leuesque ; il s'est trouué que cette marque estoit fausse ; il s'est trouué que d'autres pieces par lesquelles on auoit voulu fortifier cette marque estoient pareillement fausses ; & entr'autres vn bail, que l'on disoit auoir esté passé par Leuesque, & ceux mesmes qui l'ont signé ont recogneu qu'ils ne l'auoient signé que depuis le deceds de Leuesque & sont prisonniers pour cela, & apres leur confession, qui est la plus forte de toutes les preuues ; estant certain que le Bail & la marque y apposée, sont faux, on ne peut douter non plus de la fausseté du testament, & de toutes les pieces, ou la mesme marque est apposée.

Mais ce qui ne peut receuoir ny de response ny d'excuse, c'est que le testament a esté visiblement changé, puisque l'expedition que l'on en rapporte à present, est toute dissemblable à celle qui a esté baillée à Pinot, apportée au Sieur de Montauron ; dans laquelle le sieur de Launay estoit chargé d'auoir payé la Ville aux Oyseaux en fausse monnoye ; dans laquelle on auoit mis vne infinité de personnes qui ne sont point nommées dans ce testament, & entre autres le sieur du Tertre Barré, Tertre Ianson, Bouteueille ; iusques-là que l'on disoit que l'on en tireroit 800000. liures ; & pour mieux faire reüssir ce dessein, on auoit meslé des personnes solubles, de l'opulence desquelles on pretendoit exiger de grandes sommes ; & des miserables, de la foiblesse desquels on pretendoit tirer des declarations : & si le sieur de Launay-Graué se fust rendu facile aux accommodemens qui luy estoient proposez, toutes les personnes qui ont du bien dans la Prouince y eussent esté comprises, suivant le dessein que l'on en auoit formé, les esperances que l'on en auoit conceuës & publiées ; & tant qu'on n'a point esté pressé d'apporter le testament au Greffe, on s'est donné la liberté d'y comprendre telles personnes que l'on a voulu, pour exercer sur eux impunément vne vexation publique ; mais quand on s'est veu obliger de l'enuoyer au Greffe, on en a rayé la meilleure partie, & avec tant d'aveuglement qu'il y a preuue par escrit, & par le fait mesmes des Officiers de Mortaing, & par consequent inuincible, de l'alteration & duplicité du testament, par ce qu'ils auoient decreté contre les nommez Tesniere pere & fils, & dans le testament qui est au Greffe, il n'y a que le pere qui soit chargé.

Car quand ils ont voulu dire que Tesniere estoit chargé par d'autres informations, outre que ledit sieur de Launay estime que cela se trouuera faux, le decret ne fait point mention d'aucune information, mais du testament seul ; & iustifie par consequent la fausseté du testament, qui a esté à present rapporté, ou il n'est point fait de mention de Tesniere fils.

Et bien qu'il ne soit point necessaire de rechercher quel a esté le dessein & la suite de cet ouurage mal-heureux, qui de soy-mesme n'est que trop criminel, neantmoins il importe d'en remarquer, & la fin & le principe.

On ne peut pas douter que la fin de ceste proposition, ait esté, de faire des exactions ordinaires ausdits Officiers de Mortaing, les paroles d'accommodemens que l'on a portées au sieur de Launay-Graué, toutes les entremises aupres du sieur du Tertre Barré, les propositions publiques d'en tirer, 800000. liures, le iustifient assez, & la procedure qu'on a tenu contre les particuliers denommez dans ce testamēt, car pour la pluspart on n'a rien fait autre chose que d'aller rauager dans leurs maisons, pour les obliger à composer & ceux qu'on auoit emprisonnez on les a fait sortir quand on a veus de-

fenfes de la Chambre, & ayant voulu imputer cette euafion au fieur de Launay, & l'impofture ayant esté conuaincûe par leur procez verbal mefmes, qu'elle pution affez rude cõtre ces Iuges iniques, qui n'ont trouuë matiere ni de calomnie que dans leur propre crime, & que ne doit on point prefumer de l'iniuftice de leur procedé, quand ils ont eu la liberté toute entiere, puis que ils ont esté hardis depuis que la Chambre est faifie & à la veuë d'un Commissaire.

Mais la Chambre trouuera toutes ces fuppositions infiniment plus puniffables, quand elle fera reflection fur le premier mouuement, duquel elle font procedées, & que le premier deffein a esté de tirer Beaupré d'affaires, & de mettre malicieufement d'autres accuzez en fa place, car cette verité est fi claire, qu'il est impossible d'en doubter.

Premierement le procez de Leuesque est incontinant apres la dénonciation faite contre Beaupré, & est tellement vray; que ce procez a empesché la poursuite que l'on vouloit faire contre luy; qu'il n'y en a point eu iufques à présent contre luy par le fieur de Montauron, mais luy & ses Commis ont publié par tout, que si le testament de Leuesque n'estoit veritable, il falloit que Beaupré fust taxé; il est constant que c'est luy qui a enuoyé le testament au fieur de Montauron, avec lequel il ne pouuoit auoir de confederation puis qu'il estoit accusé aupres de luy, sinon pour se rachepier, & ny ayant employé autre chose que ce testament, peut-on doubter qu'il ait esté fabriqué à son instigation.

Ferrieres Fortin de puis qu'il est prifonnier a escrit à fa femme, qu'il n'estoit pas iuste que fa vie, son honneur & fa fortune fussent en compromis pour les interefsts de son frere; & la personne de Desbuttes qui se trouue dans ce procez, n'est-ce pas vne conuiction infaillible contre Beaupré, car il est bien vray que Desbuttes a conceu animofité contre ledit fieur de Launay, pour auoir esté intereffé dans la banqueroute de fa mere, pour en auoir defcouuert la fourbe, pour auoir eu procez contre Charnacé son Cousin, Et par cette raison ç'a esté luy qui a nommé ledit fieur de Launay pour le comprendre dans ce testament, mais ce ne peut auoir esté que par complot avec Beaupré, duquel il est vassal natif de Cresnay, son frere Curé dudit Cresnay, auquel il en a escrit, & Beaupré venant à saint Malo, pour traicter avec le Terre Barré, à logé chez Perrine le Roy mere de Desbuttes; & vne nommée la Boullaye qui demeure chez Desbuttes, a esté employée pour cette negociation Criminelle, & bien que cela soit constant & public, Desbuttes la effrontément desnié, par ce qu'il a bien iugé que cela le rendroit complice de toute cette infame conspiration, laquelle par toutes ces raisons se reconnoiffant auoir esté faite pour les interefsts & par l'artifice de Beaupré, il est en cela le premier coupable, puis que pour se iustifier d'un crime, qu'il a commis, il a esté le fuiet & le principe de tant d'autres; mais ses parens & tous les autres Ministres de ce pernicieux deffein font par la mefme raison infiniment plus puniffables, car que peut on commettre de pis que de faire feruir à l'oppression des innocens & à l'impunité des coupables, l'honneur & la foy de la Iustice, & cette puissance sacrée que Dieu n'a donnée aux hommes que pour la protection des Innocens & la punition des crimes.

Mais ce que la chambre trouuera bien plus estrange, c'est que le pretexte sur lequel Beaupré veut fonder fa iustification, sert à confirmer la certitude de son crime, & l'enormité de celuy des Officiers, car toute fa deffence est qu'il est impossible qu'il ait fuscité le procez de Leuesque, pour se deschar-

ger de la denonciation de fausse monnoye faite contre luy, parce qu'il pretend qu'il n'y a point de denonciation contre luy, & que Fremont, Menainville & sa femme, n'ont esté prisonniers ny interrogez, que depuis le procez de Leuesque commencé.

Or qu'il n'y ait point eu de denonciation contre Beaupré, la Chambre sçait trop bien le contraire, elle y a esté veüe, & est encore à present entre les mains du sieur de Montauron, & la denonciation de Menainville & sa femme, iustifie qu'elle n'a esté faite en cette forme, que par la priere de Beaupré, à laquelle Menainville & sa femme condescendirent crainte de perdre sept mil liures que Beaupré reconnoist leur deuoir, & qui iustifie le commerce qu'il a eu avec eux.

Et s'il estoit vray que la denonciation contre Beaupré n'eust esté que depuis le procez commencé, il suffiroit qu'elle precedast le testament supposé & par l'argument mesme de Beaupré, la coniecture seroit indubitable, que se voyant accusé, & vn homme dans les prisons de son cousin, il auroit fait fabriquer ce testament, lequel estant constamment supposé & s'en estant constamment seruy pour diuertir la denonciation formée contre luy, on ne peut pas douter qu'il n'en ait esté l'auteur.

Mais estant iustifié que la denonciation & la premiere deposition dattée du 7. Decembre 1636. & la premiere information du 13. Iuin 1640. sont fausses, & qu'on n'a commencé de faire le procez à Leuesque que lors qu'on l'a emprisonné, c'est vne preuue inuincible que toutes ces suppositions ont esté faictes à l'instigation de Beaupré, & pour son interest seul; Car on ne sçauroit trouuer d'autre raison imaginable, pour laquelle on ait antidatté cette information du 7. Decembre 1639. & du 13. Iuin 1640. comme elles l'ont esté constamment, sinon pour l'auantage que Beaupré en veut à present tirer. De dire que le procez de Leuesque estoit precedant à la denonciation contre luy faite, & ayant esté le moyen, la fin seule & necessaire de cette fausseté conuaincüe, qui doute qu'il ne l'ait esté de toutes les autres? Et la Chambre qui l'a veu pendant vn an entier seul solliciteur de cette affaire, & qui void que son frere se plaint, que sa vie, son honneur & son bien, soient en peril pour luy, iugera-elle pas que c'est vne confession toute claire du crime des vns & des autres.

Car s'il n'y auoit point de fraude & de fausseté, Beaupré n'y pourroit auoir d'interest, non plus que Ferrieres de peril, mais Ferrieres reconnoissant que sa vie, son honneur & son bien patissent pour son frere, n'est-ce pas aduoüer qu'il a commis ces crimes pour luy faire office, qu'il a esté la partie secrette & le sujet de ce procez, que tout a esté fait pour luy, que c'est à son interest & à son impunité qu'on a sacrifié la vie de l'vn, l'honneur & la reputation des autres.

Après tant de noires actions qui font horreur à tout le monde & honte à la Iustice, ledit sieur de Launay ne se peut assez estonner de la delicatesse des accusez, lesquels encore insensibles au remors de leur conscience, osent bien se plaindre d'auoir esté constituez prisonniers, conduits avec ignominie & indignement traictez, & bien que ces horribles meschancetez ne puissent jamais receuoir de chastiment assez rude, bien qu'il ne faille plus considerer en qualité de Iuges des personnes qui s'en sont renduës si indignes, & que s'il leur reste quelque chose de ce caractere honorable, il ne doit seruir qu'à rendre leur peine plus exemplaire: C'est vne calomnie & vne mesconnoissance impudente s'il y en eust jamais; car Monsieur le Commis-

faire leur a esté indulgent iusques à ce point, qu'ils ont fait par tout telle des-
pense qu'ils ont voulu, & Ferrieres Fortin mesmes s'est fait traicter en
Gentilhomme, & n'a point eu de honte de faire payer sa despense comme
les autres, qui sont des paysans, & les vns ont esté amenez à cheual, les autres
en carrosses. Et ils se trompent bien fort s'ils estiment meriter par cét ar-
tifice quelque sorte de compassion, apres auoir violé tous les sentimens de
l'humanité par vne iniustice si sanglante, & vne imposture si tragique, dont
la memoire ne pouuant iamais perir, il importe pour l'honneur de la Iustice,
qu'elle soit aussi memorable par l'exemple du chastiment qui ne peut iamais
estre trop rigoureux, pour en compenser l'horreur & l'enormité.

Monsieur LE GRAND, Rapporteur.



GM martin a